

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Bon dia i un felis wikent pa bo. Kontentu di tin bo riba nos plenchi atrobe. Karnaval a keda tras di lomba, awor nos a drenta temporada di kuaresma. Un temporada di silensio. Silensio den tur sentido. Menos fiesta i paranda. Menos komementu, menos papiamentu. Menos di tur kos ku bo ta hasi di mas i ku bo por apstene di dje e 40 dlanan di kuaresma ku nos a drenta awor.

Awe nos ta pone algun potret di kon nos skolnan a disfrutá di karnaval. Pa bo por gosa un tiki ainda i rekordá. Skolnan ta den full swing atrobe pa sera semester. Pues full konsentrashon i trabou duru di parti di personal i hóbennan den skol pa asina duna lo máksimo.

Korda meskos ku bo a plania kua aktividat di karnaval bo kier a bai. Planifiká tambe ki dia i ki ora bo ta bai hasi ayuno i apstenensia den e temporada di kuaresma aki.

E ta den bo man, ni maske no tin propaganda pa keda tentabu, laga bo konsenshi tentabu i plania den bo skedjule tur dia of tur siman pa hasi algu. Anto no apstene di kosnan ku bo no gusta masha. Esei no ta apstenensia. Of varia loke bo ta skohe pa asptené. Kisas enbes di apstené bo ta skohe pa ta mas sosial paso bo ta hopi asosial. Nos ta bai yudabu tur siman kua lgun kos pa hasi den kuaresma.

Nos ta deseabu un siman bendishoná

Riba roster

Ayuno/yuna i apsenensia di konsumo

Nos ta tende e palabranan ayuno of yuna i apstenensia hopi. Pero kiko esei ta i ken tin ku praktiká esaki.

Laga nos kuminsá ku e último. Mucha bou di 14 aña i adulto riba 59 aña no ta yuna i/òf apstené. Esnan malu tampoko.

Ayuno

Ayuno ta nifiká keda sin kome of bebe den un temporada. Tin diferente manera ku bo por tene ayuno. Ata algun forma di ayuno aki:

1. Tin hende ku den kuaresma ta tuma algun ora pa dia pa nan tene ayuno. P.e nan no ta kome of bebe nada ku no ta awa entre 6 or mainta pa 6 or

- atardi. Of entre 9 or mainta pa 5 or atardi. Eaki ta ayuno, paso bo no ta kome ni bebe nada.
2. Por tambe pa tuma un dia di siman pa e dia ei no kome of bebe nada ku no ta awa. Por ta riba un djabierne. Esaki tambe ta ayuno.

Apstenensia

Apstenensia ta keda sin kome sierto kos den kuaresma.

1. Keda sin kome of bebe durante henter kuaresma. P.e tin hende ku no ta kome kos dushi durante kuaresma. Of no ta kome karni at all durante e temporada di kuaresma. Keda sin kome sierto kos ta apstenensia. Apstene di kome tal kos.
2. Keda sin kome un kuminda of un bebida un dia di kuaresma. P.e. no bebe alkohol of no kome karni of nada di bestia un dia di kuaresma. Esaki ta apstenensia

Ayuno so riba so mes ta bon pa limpia bo kurpa. Esaki ta konta pa apstenensia tambe. Keda sin kome karni p.e ta un manera pa saka tur hormona for di bo sistema.

Pero ayuno/apstenensia i orashon ta yudabu krese den spiritualidat. Tuma bon nota di e informashon aki riba i práktika un forma di ayuno/apstenensia. Korda si ku semper bebe suficiente awa. Nos por bai dia sin kome, pero nos kurpa mester di awa si.

Den agènda

1 di mei dia di obrero

Skol ta será: 13 di aprel te ku 1 di mei

Mi ta konta

E pòtmòni.

Raymond a habri su wowo i ta wak rònt. E ta un di e 15 hendenan ku ta drumi den e opvang di e hendenan sin kas. E ta lanta for di su kama di pushi i lore pone den un huki. Su barika ta gruña paso el a drumi sin kome. Na e sentro ya no tin suficiente sèn pa e personanan haña kuminda. Ta un dak so pa nan por drumi anochi.

Raymond ta kana riba kaya sin energia. Su dilanti e ta mira un homber ku un potmoni pretu lombrante den su saku. E potmoni ta hala atenshon paso e ta serka di kai for di e saku.

Ata.. e potmoni a kai abou. Raymond a keda para dilanti di e potmoni sin sa kiko hasi. Despues e ta kue habrie...tin 200 florin aden.

Raymond yen di hamber tin gana di kue e sen i kore duru bai. Pero despues di duda, e ta kore bai tras di e mener i ta dune su potmoni.

Ku hamber e ta bira lomba bai. Kanando ta bai el a sitni e un hende ta kue na su brasa.

Awel e anochi ei tur hende den opvang a kome nan barika yen.

Un prechi

2017 a kuminsá bon pa Fatima College

Fatima College a habri 2017 riba bon pia ku su alumnonan logrando éksito en diferente ramo di deporte lokal i den otro aktividatnan sosial kultural. Despues ku 2016 a sera ku partisipashon eksitoso di Julinette Diaz Avila den CuraStars Strea Chikí i ku un partisipashon tur afó den e proyekto “Raad van Kinderen” alumnonan di Fatima College a habri aña riba e mes pia ku vários alumno konkistando puestonan haltu den kompetensianan di atletismo i arte marsial entre otro.

E logronan no a keda te einan. Fatima College a partisipá ku dos duo na elekshon di Prens i Pancho pa Karnaval Hubenil algun siman pasá. Un duo (Bryangelo Claresa i Isaiah Nahr) a sali Prens i Pancho Hubenil 2017 i e otro duo (Johainer i Johaiver van Putten) a resultá e promé finalistanan. Huntu ku Reina Angela Streedel, maske e no a kai den premio, tabatin un aktuashon balente i a representá Fatima College dignamente.

Den fin di siman di 11 di febrüari pasá Mehki Nahr i Naydrickson Amerikan a partisipá ku éksito na elekshon di Prens i Prensès Infantil 2017. Naydrickson a sali promé finalista Prens Infantil i esun mas popular di e evento. Manera e mes ta bisa a sali “un finalista”. I Mahki a sali di dos finalista di e elekshon ademas di a gana e premio di mihó Trahe i e partisipante mas dinámiko.

Komo sifuera no ta basta e ekipo di basketbòl maskulino di Fatima College despues di a pèrdè un partido den e ronda preliminar di e kampionato eskolar organisá pa FDDK den un wega emoshonante a kai vensí 28-27 den final kontra Oranje School. Banda di a sali sup-kampion di e torneo Fatima College su ekipo a resultá e ekipo mas disipliná di e torneo.

Un felisitashon ta bai na tur e muchanan aki sperando ku den nan desaroyo eskolar tambe nan lo ta mes òf mas eksitoso.





Mucha djispou

Bertha a pidi su kasa Robert pa hasie un fabor i buska nan yu for di kresh trese kas.

Robert a kumpli ku e petishon. For di na kaminda el a bel su kasá pa reklamá ku e yu ta yora sin stòp. E no por komprondé pakiko tantu yoramentu.

For di ora Bertha a tende e outo drenta kurá el a sali pa bai wak kiko ta e problema.

Bertha: “Robert bo si bo sa, esaki no ta nos yu. Ta pesei e pober ta yora paso e no sa ken bo ta.”